

Repsol Oil & Gas Malaysia Limited Bantu Murid Dari Golongan Komuniti Nelayan



8 Februari 2017 – Jabatan Pendidikan Wilayah Persekutuan mengucapkan setinggi-tinggi penghargaan dan ucapan terima kasih kepada pihak Repsol Oil & Gas Malaysia Limited di atas usaha murni memberi sumbangan dalam bentuk wang ringgit kepada murid-murid sekolah dari golongan komuniti nelayan berpendapatan rendah di Wilayah Persekutuan Labuan.

Bantuan ini merupakan insentif daripada Repsol Malaysia Limited bagi membantu komuniti di sekitar tempat operasi di luar pantai khususnya kaum nelayan. Demikian ucapan daripada Pengarah Pendidikan, Jabatan Pendidikan Wilayah Persekutuan Labuan, Encik Raisin Saidin.

Majlis anugerah motivasi bagi murid-murid UPSR dan PT3 Tahun 2016 dari golongan komuniti nelayan peringkat Wilayah Persekutuan Labuan ini telah disempurnakan oleh Encik Farid Jaafar, Pengurus Besar Kanan Jabatan

Perhubungan dan Hal Ehwal Kerajaan dan Komuniti, Repsol Oil & Gas Malaysia Limited.

Seramai 50 orang murid daripada 10 buah sekolah terlibat menerima bantuan tersebut iaitu SMK Lajau, SMK Pantai, SK Lubok Temiang, SK Patau-Patau, SKK SK Ranza-Ranza, SK Bebuloh, SK Layang-Layangan, SK Sungai Lada, SK Tanjung Aru dan SK Pantai. Sasaran penerima bantuan wang ini adalah kepada murid Tingkatan 3 dan murid Tahun 6 yang cemerlang dan berasal dari golongan komuniti nelayan pada tahun 2016.

Menurut En Farid, mereka yang terpilih merupakan murid yang bukan sahaja cemerlang dalam peperiksaan UPSR dan PT3, tetapi juga aktif dalam penglibatan kokurikulum di sekolah masing-masing.

Turut sama hadir pada majlis tersebut adalah Ketua-Ketua Sektor, Pengetua dan Guru Besar, Pegawai-Pegawai Repsol dan Pegawai-Pegawai Jabatan Pendidikan WP Labuan.

**Seramai 109 Warga
Pendidikan WP Labuan
Menerima Surat Kenaikan
Pangkat**



7 Februari 2017 – Seramai 109 warga pendidikan di Wilayah Persekutuan Labuan telah menerima Surat Kenaikan Pangkat yang telah disampaikan oleh Pengarah Pendidikan Jabatan Pendidikan WP Labuan, Encik Raisin Saidin bertempat di dewan SJK(C) Chi Wen.

Beliau menzahirkan ucapan tahniah dan terima kasih kepada semua warga pendidikan yang sentiasa bersungguh-sungguh tanpa mengira samada Pegawai Perkhidmatan Pendidikan maupun Pegawai Kumpulan Pelaksana, sama-sama menjadi pemangkin kejayaan pendidikan di Wilayah Persekutuan Labuan.

Pegawai Perkhidmatan Pendidikan yang dikenali umum sebagai Guru, adalah insan yang paling dekat dengan murid. Insan yang sebenarnya penyumbang utama dalam mendidik dan membangunkan manusia sebagai modal insan yang berjaya dari pelbagai aspek, samada inteleknya, jasmaninya, rohaninya, sahsiahnya maupun emosinya.

Para Pegawai Kumpulan Pelaksana pula adalah pendokong utama dalam memastikan pelaksanaan semua operasi pendidikan berjalan lancar. Samada sebagai Pemandu atau Kerani maupun Pembantu Operasi. Masing-masing mempunyai peranan yang penting dalam kejayaan pengoperasian pengurusan organisasi bagi Jabatan Pendidikan WP Labuan dan sekolah.

*"Saya menyeru semua penerima surat kenaikan pangkat hari ini dan semua hadirin yang bersama dalam majlis yang bermakna ini, supaya sentiasa menyedari tanggungjawab kita semua untuk memastikan kita menyumbang kepada faedah anak-anak kita khasnya dan generasi penerus yang dididik di WP Labuan. Kita semua accountable untuk bersama dalam memberi perhatian, kasih sayang dan bertanggungjawab dalam mencorakkan masa depan generasi Anak Malaysia yang lebih bermakna",
Encik Raisin Saidin.*



Memartabatkan Roh PdPc Abad ke-21



7 Februari 2017 – Memartabatkan Roh PdPc Abad ke 21, begitulah tema Perhimpunan Bulanan JPWPL bagi bulan Februari 2017. Tema ini diilhamkan dan telah diumumkan sendiri oleh Pengarah Pendidikan, Jabatan Pendidikan WP Labuan, Encik Raisin bin Saidin.

Beliau berkata, betapa pentingnya keberhasilan pendidikan yang diterjemahkan dengan pembangunan insan yang berkualiti merupakan sandaran negara ke arah negara maju.

Amanah ini merupakan tanggungjawab besar yang perlu dihayati oleh semua warga pendidikan terutama guru-guru di bilik darjah. Peranan dan komitmen guru amat diperlukan dan malah tugas menjadi sangat mencabar dengan keperluan pembelajaran Abad ke-21. Encik Raisin Saidin.

Guru yang berkualiti dan bersedia menghadapi cabaran menjadi sandaran Kementerian Pendidikan untuk merealisasikan transformasi pendidikan negara seperti dihasrat melalui Pelan Pembangunan Pendidikan Malaysia 2013 – 2025.

Sesuai dengan tema bulanan pada perhimpunan ini iaitu Memartabatkan Roh PdPc Abad ke 21, Cikgu Nazrin Ismail dari SMK Labuan telah dianugerahkan Guru Tauladan bagi amalan PdPc abad ke 21 bagi bulan Februari 2017.

Antara inovasi beliau yang pernah memenangi anugerah adalah inovasi Alat Bantu Mengajar *i-Line Board* yang membantu murid meningkatkan kemahiran menghasilkan pelbagai garisan dalam tajuk lukisan teknik.

Anugerah ini diberikan kepada guru yang banyak menyumbang bakti dalam amalan PdPc abad ke 21 di dalam bilik darjah seterusnya menggalakkan semua guru untuk mempelbagaikan kaedah PdPc yang pada masa ini lebih berkonsepkan pembimbing dan pemudah cara kepada murid berasaskan amalan PdPc abad ke 21.

Encik Raisin juga mengingatkan pegawai jabatan dan pentadbir sekolah sentiasa membangunkan strategi, kerja berpasukan, mengambil tindakan *follow up dan follow through* bagi mencapai matlamat yang disasarkan.

Perhimpunan bulanan bagi bulan Februari ini diserikan lagi dengan majlis penyampaian sijil anugerah kecemerlangan kepada pihak sekolah, *staff of the month* dan meraikan sambutan hari lahir kepada kakitangan jabatan serta sekolah yang lahir pada bulan Februari.

Jom Ke Sekolah Membantu Sahsiah Murid



6 Februari 2017 – Majlis pelancaran Program Jom Ke Sekolah Peringkat Jabatan Pendidikan Wilayah Persekutuan Labuan telah diadakan bertempat di Dewan SMK Labuan.

Semua sekolah di bawah Kementerian Pendidikan Malaysia melancarkan program ini secara serentak pada 5 dan 6hb Februari 2017. Ianya adalah kolaborasi di antara KPM dan PDRM melalui Jabatan Pencegahan Jenayah dan Keselamatan Komuniti (JPJKK) yang bertujuan menangani permasalahan disiplin dan salah laku pelajar.

Dalam ucapan Pengarah Pendidikan WP Labuan, Encik Raisin bin Saidin berkata, pemuafakatan bersama PDRM, komuniti, ibu bapa dengan pihak sekolah akan dapat mempertingkatkan minat murid untuk hadir ke sekolah.

Kementerian Pendidikan telah melaksanakan pelbagai inisiatif termasuk penerapan elemen pembelajaran menyeronokkan bagi memastikan murid-murid gembira ke sekolah sekaligus dapat melahirkan insan yang seimbang dan harmoni merangkumi aspek intelek, rohani, emosi dan jasmani.

KPM berusaha membentuk ekosistem pembelajaran abad ke 21 bagi memastikan hasrat Falsafah Pendidikan Kebangsaan tercapai melalui budaya sekolah, prasarana, pelibatan ibu

bapa dan komuniti, guru yang profesional serta proses pengajaran dan pembelajaran yang berkesan.

Pentadbir sekolah yang berkesan akan berupaya menghasilkan pembelajaran yang kondusif, menyeronokkan, memberi aspirasi dan inspirasi kepada murid untuk datang ke sekolah setiap hari dengan perasaan gembira dan seronok untuk belajar, Encik Raisin Saidin.

ACP Abdul Razak Bin Hassan, Timbalan Ketua Jabatan Pencegahan Jenayah dan Keselamatan Komuniti, IPK Sabah berkata, PDRM amat prihatin tentang permasalahan sosial dan salah laku jenayah dalam kalangan generasi muda, khususnya yang melibatkan pelajar-pelajar sekolah.

Sehubungan dengan itu, PDRM sentiasa memantau pelajar-pelajar yang terlibat dengan salah laku disiplin, lebih-lebih lagi yang menyumbang kepada perlakuan jenayah. Kerjasama rapat antara pihak sekolah dengan PDRM dilihat berupaya membendung salah laku ini daripada berleluasa.



Dalam menyokong usaha ini, Pegawai Perhubungan Sekolah (PPS) dari kalangan pegawai dan anggota polis dilantik

bagi setiap sekolah, bertujuan mewujudkan komunikasi berterusan antara PDRM dan pihak sekolah ke arah meningkatkan kesedaran terhadap jenis perlakuan jenayah yang berubah-ubah mengikut persekitaran sosial sesebuah sekolah.

PPS turut memainkan peranan dalam membantu mewujudkan suasana sekolah yang selamat, sebagaimana yang telah digariskan dalam Buku Panduan Pengawai Perhubungan Sekolah (PPS).

Antaranya termasuklah mengumpul maklumat daripada sekolah untuk diambil tindakan jika perlu, melakukan rondaan berjadual di kawasan sekolah dan memberikan ceramah berkaitan dengan hal-hal keselamatan kepada warga sekolah.

Bersempena pelancaran Program Jom Ke Sekolah ini, KPM telah mengambil inisiatif iaitu menggalakkan sekolah menyediakan saluran aduan berkenaan isu dan masalah disiplin pelajar melalui Peti Aduan Disiplin Murid.

Menerusi peti aduan diharapkan semua murid dapat menyalurkan maklumat yang diperolehi berkaitan salah laku yang berlaku sama ada di dalam atau di luar sekolah kepada pihak berkuasa.



500 guru hadir Majlis Perutusan Tahun Baharu 2017



21 Jan 2017 – Hampir 500 warga guru telah menghadiri

Majlis Perutusan Tahun Baharu 2017 , Jabatan Pendidikan Wilayah Persekutuan Labuan yang diadakan di dewan Sekolah Antarabangsa Labuan (LIS).

Pengarah Jabatan Pendidikan W.P Labuan, Encik Raisin Saidin menyampaikan amanat dan perutusan Tahun Baharu 2017 serta sedutan Menteri Pendidikan Datuk Seri Mahdzir Khalid dan ucapan Ahli Parlimen Labuan Datuk Rozman Isli.

Sambil mengucapkan terima kasih atas kehadiran tetamu termasuk pesara guru, Encik Raisin Saidin meminta semua pihak khususnya ibu bapa dan komuniti sentiasa berkerjasama dan berganding bahu dengan pihak jabatan dan sekolah untuk mencemerlangkan pendidikan anak-anak di sekolah rendah dan menengah di Wilayah Persekutuan Labuan.

Katanya komitmen semua pihak termasuk jabatan dan agensi kerajaan serta swasta dan pemimpin masyarakat dalam memastikan kecemerlangan pendidikan di Labuan amat diperlukan kerana kejayaan anak-anak merupakan milik semua warga Wilayah Persekutuan Labuan.

Beliau juga berharap ibu bapa akan terus memainkan peranan utama mereka menerusi PIBG membantu pihak sekolah menjayakan pelbagai program khususnya yang berkaitan dengan akademik.

Turut hadir Ahli Dewan Negara, Senator Datuk Yunus Kurus, Ketua Sektor Pengurusan Sekolah Maimoon Matnoh selaku pengerusi pengelola dan Pengerusi Dewan Usahawan Melayu Labuan (DUML) Dato' Sri Mohd Alias Abd Rahman.

Majlis yang bermula jam 8 pagi itu dimeriahkan dengan persembahan koir lagu-lagu patriotik yang disampaikan oleh SMK Labuan dan bacaan lafaz ikrar Perkhidmatan Awam dan Rukun Negara yang diketuai oleh Pengetua SMK Ranche-Ranche Omar Baki Matusin.

Turut diadakan penyampaian Anugerah Tokoh Teladan Integriti kepada empat penerima yang terdiri daripada pegawai, pengetua dan ibu bapa cemerlang.



Ustaz Roslan Mohamed – Jasamu Sentiasa Dikenang

Raut wajah damai dan tenang
Tiada terkalam kasih dijunjung
Jasa baktimu tetap dikenang
Budi baikmu tetap disanjung

Ayam rintik di pinggir hutan
Nampak dari tepi telaga
Nama yang baik jadi ingatan
Seribu tahun terkenang juga



Selamat Bersara - Ustaz Roslan bin Mohamed

6 Januari – Jasamu sentiasa dikenang sebagai pendidik anak bangsa (1978-2017). Persaraan Ustaz Roslan bin Mohamed pada 5hb Januari 2017. Sedikit biodata mengenai ustaz Roslan :

Roslan dilahirkan di Kampung Relong, Kuala Lipis, Pahang pada 6 Januari 1957 merupakan anak ke-7 daripada 11 adik-beradik.

Beliau mendapat pendidikan awal di SK Relong, Kuala Lipis (1964-1969), Sekolah Menengah Ugama Padang Tungku, Kuala Lipis(1970-1975) sebelum melanjutkan pendidikan di Sekolah Tinggi Ugama Sultan Abu Bakar, Pekan Pahang (1976-1977).

Bertugas sebagai guru sementara di SM St Patrick Membakut, Sabah (1978-1991) dan SK Kerupang, Wilayah Persekutuan Labuan (1991-2011).

Pada 1 Mac 2011, beliau dilantik sebagai Penyelia Unit Pendidikan Islam di Jabatan Pendidikan Negeri Labuan.

Beliau dilantik pula sebagai Ketua Unit Pendidikan Islam di Jabatan Pendidikan Negeri Labuan pada 23 September 2013 sehingga bersara wajib pada 6 Januari lalu.

Roslan mendapat Latihan Kursus Dalam Cuti (KDC) ambilan 1989/1991 di Maktab Perguruan Gaya, Kota Kinabalu dengan Pangkat Cemerlang.

Pada tahun 1999 dan 2014, beliau menerima Anugerah Perkhidmatan Cemerlang (APC).

Antara jawatan yang pernah beliau sandang ialah Pengerusi Tabika Perpaduan Kg Durian Tunjong selama dua penggal (2000-2001 dan 2001-2002), Ketua Biro Pelajaran Masjid Al Mutakkin Kerupang 2 selama lima tahun (2005-2010), imam dan khatib jemputan Masjid Al Mutakkin, Masjid Kg Durian Tunjong dan Masjid Kg Tg Aru, dan Setiausaha Pertubuhan Kegiatan Dakwah Islamiah Sekolah- Sekolah (Pekdis) Malaysia Cawangan Labuan (2011-2016).

Roslan mendirikan rumah tangga dengan Rajima Daud pada 25 Disember 1982 dan dikurniakan 4 cahaya mata – dua lelaki dan dua perempuan. Kini mempunyai tiga menantu dan tiga cucu.

“Setelah bersara, saya akan menumpukan sepenuh masa membantu keluarga dalam bidang perniagaan perabot jati,” katanya.



KAU YANG KUKENAL

Wajah tenang
Pada bicara sopanmu
Pada perkongsian rencah rohani pada budimu
Penjawat setia bertahun
Menabur bakti kepada
Masyarkat sepulau kasih
Pada kata-kata kecindan
Lucumu menghiburkan
Tak lokek senyuman
Kita terus bersahabat
Pada jalinan kasihmu
Tertumpah cinta pulau bertuah
Menyambung perjalanan
Kehidupan ke sebelah sana
Terima kasih Tuan
Nanti kami singgah
Sekali-sekala Ima Jati
Jadi ingatan kenangan
Perantauan 1978 ke 2017
Pulangkah Pahang Darul Makmur rindumu bertahta
Bilakah?

Doamu pada Tahajut dan Duhamu
Kami juga setulus doa
Kebahagiaan sekeluargamu
Duniawi dan ukhrawi....

SAMSA HARRIS

Dedikasi khas untuk Ustaz Roslan Mohamed

Lawatan Pemantauan Hari Pertama Persekolahan Tahun 2017



3 Jan 2017 – Pengarah Jabatan Pendidikan WP Labuan,

En Raisin bin Saidin telah mengadakan lawatan pemantauan hari pertama sesi persekolahan tahun 2017 di dua buah sekolah sekitar Labuan iaitu di SJKC Chi Wen dan SK Patau-Patau.

Beliau diiringi oleh ketua-ketua sektor dan pegawai daripada Jabatan Pendidikan WP Labuan.

Dalam ucapan beliau di SJK(C) Chi Wen, memaklumkan bagi sesi pendaftaran tahun 1 bagi tahun 2017, seramai 1,568 pelajar tahun 1 telah mendaftar manakala bagi Tingkatan 1 seramai 1,202 pelajar telah mendaftar di sekolah-sekolah W.P Labuan. Pada Sesi lawatan tersebut Pengarah juga sempat beramah mesra dengan ibubapa.

En. Raisin bin Saidin juga mengucapkan syabas dan tahniah kepada warga sekolah yang telah berjaya menjalankan tugas pada hari pertama ini dengan baik.

Beliau berharap agar kecemerlangan dalam mendidik anak-anak murid dapat dipertingkatkan dari semasa ke semasa.



1410 Guru Labuan Terima Pelan Data Internet dan Telefon Pintar



30 Dis 2016 – 1410 guru sekolah menengah dan rendah seluruh Labuan menerima agihan Pelan Data Internet dan “Smart Phone Altitude” dibawah Projek Perkhidmatan 1Bestarinet Fasa Dua Kementerian Pendidikan Malaysia hari ini.

Pelan Data Internet 2GB setiap bulan dan “Smart Phone Altitude” merupakan penambahbaikan dari perkhidmatan 1Bestarinet Fasa 1.

Telefon pintar ini dilengkapi dengan aplikasi yang telah disepadukan dengan aplikasi Frog Assignment, Frog Chat dan Frog Snap untuk membolehkan akses untuk menyemak kerja rumah yg diberikan kepada pelajar.

Menurut Pengarah Jabatan Pendidikan Wilayah Persekutuan

Labuan, Encik Raisin Saidin, 1BestariNet merupakan projek transformasi pendidikan yang diperkenalkan kerajaan bagi menghubungkan semua sekolah kepada satu platform pembelajaran tunggal, mesra pengguna dengan persekitaran rangkaian yang lebih selamat.

Telefon pintar ini turut dilengkapi dan disepadukan dengan aplikasi Frog Assignment, Frog Chat dan Frog Snap yang lebih fleksibel serta mudah digunakan.

Melalui aplikasi ini, guru boleh memberi dan menyemak tugas murid melalui “Frog Virtual Learning Environment “ (VLE) di mana sahaja dengan mudah dan ia juga dilengkapi dengan Pelan Data Guru 2GB bagi setiap guru yang membolehkan guru mengakses internet untuk tujuan Pembelajaran dan Pengajaran.

“Di samping mereka boleh berhubung dengan rakan guru lain dengan panggilan dan SMS tanpa kos pada bila-bila masa dan di mana jua bagi bertukar-tukar idea dan pendapat untuk meningkatkan lagi mutu pengajaran terhadap para pelajar”.

“Memandangkan 1BestariNet adalah komponen utama dalam Anjakan 7, Pelan Pembangunan Pendidikan Malaysia, maka agihan smart phone ini kepada guru-guru dapat meningkatkan lagi pengajaran dan pembelajaran (PdP) di sekolah masing-masing, terutamanya dalam Frog VLE”.
Encik Raisin Saidin.

Beliau berharap agar para pendidik dapat memanfaatkan kemudahan yang diberikan ini dengan kelebihan teknologi di dalam pembelajaran masa kini yang tidak pernah dirasakan oleh mereka sebelum ini sebagai landasan untuk menerokai kaedah baru pembelajaran yang bersesuaian dengan gaya dan tempo pembelajaran alaf baharu.



“Penerimaan telefon pintar tersebut diharapkan menyumbang ke arah hasrat kerajaan untuk membudayakan ICT dalam kalangan guru dan murid”, ujar Ahli Parlimen Labuan, Datuk Rozman Haji Isli.

Beliau berkata demikian ketika merasmikan Majlis Pengagihan Telefon Pintar tersebut di Bahagian Teknologi Pendidikan Negeri WP Labuan, di sini, petang tadi.

“Peluasan penggunaan dan kemajuan yang telah dicapai dalam bidang ICT di Malaysia adalah sesuatu yang boleh dibanggakan”,

“Langkah Kerajaan dalam melaksanakan pelbagai projek transformasi dan program ICT dalam pendidikan telah berjaya membudayakan ICT sebagai budaya kerja dalam bidang pendidikan”. Datuk Rozman Haji Isli.

Datuk Rozman optimis tahap ICT murid-murid dan guru-guru semakin hari semakin meningkat dan adalah tidak keterlaluan bahawa hampir semua guru dan murid dalam sistem persekolahan telah didedahkan kepada literasi ICT sama ada dalam pendidikan mahu pun pengurusan.

Bagi Pengetua Sekolah Menengah Pantai IB World Labuan, Encik Sahar Misron berasa gembira dan bersyukur dengan adanya telefon pintar tersebut ia akan menaikkan lagi mutu pembelajaran bukan sahaja di sekolahnya bahkan kesemua 27 sekolah menengah dan rendah yang ada di Labuan ini kerana akhirnya para pelajar sendirilah yang akan mendapat manfaat daripada kaedah pembelajaran tersebut.

Beliau juga berharap agar kemudahan ini turut memberi impak positif kepada murid dalam proses pembelajaran menerusi teknologi terkini serta membantu ibubapa dalam pemantauan tugas secara atas talian.

Turut hadir Pengarah Pembangunan Perniagaan YTL Communication Sdn Bhd, Haji Shahirul Amran yang mana syarikat tersebut merupakan Pembekal Perkhidmatan Projek lBestariNet Fasa 2 ini.

Majlis Anugerah Teknologi Pendidikan Labuan 2016



27 Nov 2016 – Lebih daripada 50 anugerah daripada 23

kategori telah disampaikan dalam Majlis Anugerah Teknologi Pendidikan Labuan yang diadakan di Bahagian Teknologi Pendidikan Negeri Wilayah Persekutuan Labuan, Sungai Lada baru-baru ini.

Pengarah Jabatan Pendidikan Labuan, Encik Raisin Saidin berkata, anugerah tersebut ialah sebagai pengiktirafan kepada hasil usaha, kesungguhan dan pencapaian terbaik yang ditunjukkan oleh pihak sekolah dalam bidang pusat sumber sekolah dan ICT.

“Setiap kategori anugerah telah dikenal pasti untuk diberi pengiktirafan, dimana kesemuanya melibatkan bagaimana teknologi pendidikan yang merangkumi pusat sumber sekolah dan peralatan ICT itu direka bentuk agar dapat digunakan atau dapat menyumbang kepada akses maklumat khususnya kepada murid sama ada di dalam bilik darjah mahu pun di luar bilik darjah,” katanya.

Antara anugerah yang diberikan ialah anugerah guru penyelaras bestari/ICT, anugerah guru perpustakaan dan media, anugerah guru data, anugerah juruteknik komputer, anugerah VLE, anugerah pusat sumber cemerlang, anugerah pusat sumber pencapaian lima bintang, anugerah makmal komputer terbaik, anugerah laman web sekolah, anugerah pengurusan pusat akses sekolah terbaik, anugerah pembestarian sekolah dan anugerah pengurusan data sekolah.

Karnival Gempak PIBK 2016



26 Nov 2016 – Karnival Gempak PIBK 2016 yang julung-julung kalinya diadakan hasil gabungan Pemuafakatan YDP PIBG seluruh Labuan. Program seperti ini adalah bertepatan dengan anjakan ke 9 dalam Pelan Pembangunan Pendidikan Malaysia iaitu Bekerjasama Dengan Ibu Bapa, dan Komuniti secara meluas. Karnival ini dirasmikan oleh Yang Berhormat Datuk Rozman bin Hj. Datu Isli, Ahli Parlimen P. 166 W.P. Labuan dan pelbagai acara menarik telah dirancang sepanjang karnival tersebut berlangsung antaranya ialah pertandingan bola sepak pantai, bola tampar pantai, mewarna, teka bilangan biji kacang dan cabutan bertuah kepada pengunjung yang bertuah.